

Nivaap imartaata itisilernissaanut 2023-mi misissueqqissaarnissamut Naalakkersuisut peqquneqarnissaannik Inatsisartut aalajangiiffingisassaattut siunnersuut.

(Inatsisartunut ilaasortaq, Kristian Jeremiassen, Inuit Ataqatigiit)

pillugu

Sanaartornermut Ataatsimiititaliap

Siunnersuutip aappassaaneerneqarneranut

ISUMALIUTISSIISSUTAA

Sanaartornermut Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Kristian Jeremiassen, Inuit Ataqatigiit, Siulittaasoq

Inatsisartunut ilaasortaq Siverth K. Heilmann, Atassut, siulittaasup tullia

Inatsisartunut ilaasortaq Harald Bianco, Inuit Ataqatigiit

Inatsisartunut ilaasortaq Anders Olsen, Siumut

Inatsisartunut ilaasortaq Jens Kristian Therkelsen, Siumut

Siunnersuutip Inatsisartunit siullermeerneqarnera

UKA 2022-imi ulloq 25. oktober 2022-mi siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Nivaap imartaata itisilernerneqarnissaannik suliaqarnissap aallartisarnissaannik qulakkeerinnittoqarnissaa siunnersuummit siunertarinqarpoq.

Siunnersuutip Inatsisartunit siullermeerneqarnera

Siunnersuutip siullermeerneqarnerani allannguutissatut siunnersuut tulliuuttoq Naalakkersuisunit saqqummiunneqarpoq:

”Nivaami ikerasak suliarineqarnissaa immikkut ittumik ukkataralugu imarsiornermut tunngatillugu attaveqaasersuutit pitsanngorsarnissaat pillugu Kommune Qeqertaliup tulleriiaarineranik, matumani kommunip aningaasaleeqataanissaanut periarfissai ilanngullugit, Naalakkersuisut Kommune Qeqertalimmut saaffiginnissuteqarnissaannik peqquneqarnissaannik Inatsisartut aalajangiiffigisassaattut siunnersuut.”

Naalakkersuisunit allannguutissatut siunnersuutigineqartoq, imarsiornermi sillimaniarnerup ukkatarineqarnissaa, soorlutaaq ikerasaliornissamut immikkoortoq allatigullu imarsiornermut tunngatillugu attaveqaasersuutit ukkatarineqassasut annertuummik naalakkersuinikkut taperserneqarpoq.

Siunnersuutip ataatsimiititaliamit suliarineqarnera

Naalakkersuisut allannguutissatut siunnersuutaat annertuummik taperserneqarnera ataatsimiititaliamit maluginiarneqarpoq.

Umiatsiaaraq 30-it ataallugit qulaallugilluunniit fod-inik angissuseqarnera angallatilluunniit angissusaat apeqqutaatinnagu, naalakkersuinikkut suliaqartunit sillimaniarnissaaq salliutinneqarnissaa, annertuummik taperserneqarnera tamatumani aamma ataatsimiititaliamit malugeqquneqassaaq.

Kalaallit Nunaata sineriaani angallaviit isumannaannerusut orsussamillu atuilluarfiusut pilersinneqarnissaasa siuariartorfiunissaat pingaaruteqartoq aammattaaq ataatsimiititaliap paasivaa.

Kalaallit Nunaanni imarsiornermut atugassanik ikerasaliornissamik pisariaqartitsineq pillugu nassuiaat tamanut saqqummiunneqarnera sioqqullugu kinguneratigullu ikerasaliortoqassanersoq itisiliisoqassanersorluunniit naalakkersuinikkut oqallinnerit arlallit ingerlanikummata ataatsimiititaliamit maluginiarneqarpoq. Tassunga ilaatigut siunnersuutit UKA2021/93 aamma UKA2020/44 innersuussutigineqassapput, soorlutaaq arlalinnik § 37-i tunngavigalugu apeqquteqartoqarnera kommunalbestyrelsini assigiinngitsuni ikerasaat pillugit oqallittoqartarsimasoq. Tassunga Naalakkersuisut akissuteqaatiminni ilisimatitsissuteqarmata ataatsimiititaliamit maluginiarneqarpoq:

”Taamaakkaluartoq ikerasaat, itisiliinernillu suliaqarneq kommunit imaluunniit Namminersorlutik Oqartussat susassa qarfigineraat suli erseqqissarneqarnikuunngilaq.”

§ 37 tunngavigalugu Nivaap ikerasaata itisilerneqarnissaa pillugu apeqqut 2021-153, akissummi allaqqavoq:

”Tamanna manna tikillugu ersarinnerusumik misissuiffigineqarnikuunngilaq, sioqqallu patsisaallutik ikerasaliap ikkalisarnerata iliuseqarfigineqarnissaani aningaasartuutissat matussuserneqarnissaat Namminersorlutik Oqartussat kommunilluunniit akisussaaffigissaneraat pillugu kommunit peqatigalugit eqqartorneqassalluni. [...] Naalackersuinikkut Ataqtigiissaarisogatigiit 2022-mi januaarimi ataatsimiinnissaanni kommunit peqatigalugit tamanna eqqartorneqassasoq naatsorsuutigineqarpoq”

Taamaammat ataqtigiissaarisut januar 2022-mi ataatsimiinnerminni ajornartorsiut qanoq aalajangiiffigisimaneraat oqallinnerullu inenera pillugu aappassaaneerinninnissamut Naalackersuisunit ataatsimiititaliamut ilisimatitsissutigineqarnissaannik qinnuigineqassapput.

Naalackersuisunit kommunit tamaasa peqatigalugit tamanna qulaajarneqassasoq ataatsimiititaliamit siunertamut tulluuttuusorineqarpoq. Ikerasaliortoqarnissaanik itisiliisoqarnissaanillu suliat Naalackersuisunit kommuninilluunniit pingaarnersiorneqarlutik isumagineqassanersulluunniit taamaalilluni ersarissarneqarsinnaassaaq.

Kommunit aalajangiiffigisassatut siunnersuummut allannguutissatullu siunnersuummut matumunnga attuumassutillit Naalackersuisunit akuutinneqarnissaat ataatsimiititaliamit siunertamut tulluuttuutinneqarpoq.

Siunnersuutip aningaasatigut kingunerisassai


Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunngortinnerani aningaasaqarnikkut allaffissornikkullu kingunerisassat siunnersuutip tunngavilersuutaani aallaaserineqassasut.

Siunnersuummi siunnersuutip aningaasatigut kingunerisassai allaaserineqartut, siunnersuut piviusunngortinneqassappat aningaasatigut kingunerisassai naammattumik allaaserineqarsimasut, tamatumani Naalackersuisut allannguutissatut siunnersuutaat akuersissutigineqassappat aningaasartuutissat amerlanerulernissaannik kinguneqarnaviangitsoq ataatsimiititaliamit maluginiarneqarpoq.

Ataatsimiititaliap inassutai

Ataatsimiititaliap isumaqatiittup Naalakkersuisut allannguutissatut siunnersuutaata akuerineqarnissaa inassutigaa.

Taamatut oqaaseqarluni isumaliutissiisummillu allassimasutut paasinnilluni matumuuna ataatsimiititaliap siunnersuut aappasaaniigassanngortippaa.




Kristian Jeremiassen
Siulittaasoq




Siverth K. Heilmann
Siulittaasup tullia



Harald Bianco



Anders Olsen



Jens Kristian Therkelsen